

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : DATUK IR. DR. WEE KA SIONG
[AYER HITAM]**

TARIKH : 2 APRIL 2014

RUJUKAN : 6590

SOALAN:

Datuk Ir. Dr. Wee Ka Siong [Ayer Hitam] minta **MENTERI DALAM NEGERI** menyatakan sama ada program pemutihan bagi pekerja asing akan dihidupkan semula memandangkan keperluan di pasaran khususnya dari sektor perkhidmatan pertanian dan sektor pembinaan.

JAWAPAN:

Tuan Yang di-Pertua,

Program 6P telah tamat sepenuhnya pada 30 November 2012. Malahan Program Khas Pengurusan PATI (PKPP) yang dilaksanakan untuk membantu majikan yang ditipu oleh agen atau orang tengah semasa Program 6P juga telah tamat pada 20 Januari 2014.

Pada masa ini, Kerajaan tidak bercadang untuk meneruskan program-program tersebut kerana Kerajaan telah memberikan tempoh masa yang mencukupi kepada majikan untuk mendapatkan kebenaran bekerja bagi PATI mereka. Sekiranya Kerajaan meneruskan program-program tersebut dikhuatiri bertentangan dengan dasar dan prosedur sedia ada bagi pengambilan pekerja asing di Malaysia. Malahan, kemasukan warga asing ke Malaysia secara tidak teratur akan berterusan dan usaha Kerajaan untuk menangani isu PATI ini akan terjejas.

Sehubungan itu, Kerajaan juga amat tegas dalam melaksanakan tindakan penguatkuasaan melalui Ops 6P Bersepadu bagi mengesan, menangkap, mendakwa dan mengusir PATI yang gagal mendapatkan kebenaran bekerja dan masih berada dalam negara. Kerajaan akan memastikan bahawa tahun ini adalah merupakan tahun penguatkuasaan untuk menangani PATI yang masih berada dalam negara.

Berhubung keperluan pekerja asing di sektor perkhidmatan, pertanian dan pembinaan, pelaksanaan program-program tersebut adalah merupakan program *one-off* bagi memenuhi keperluan sementara guna tenaga tambahan di sektor-sektor berkenaan. Hasil daripada program-program tersebut seramai 122,321 PATI di sektor perkhidmatan, 34,525 PATI di sektor pertanian dan 198,620 PATI di sektor pembinaan telah berjaya diberikan kebenaran bekerja.

Malahan, sektor-sektor berkenaan juga adalah merupakan sektor-sektor yang dibenarkan untuk pengambilan pekerja asing. Sehubungan ini, sebarang keperluan untuk mendapatkan pekerja asing di sektor-sektor berkenaan boleh dikemukakan di Pusat Kelulusan Setempat (*One Stop Centre –OSC*), Kementerian Dalam Negeri seperti mana dasar dan prosedur pengambilan pekerja asing sedia ada. Selain itu, tempoh penggajian bagi permohonan pengambilan pekerja asing baru adalah selama 10 tahun berbanding dengan tempoh penggajian di bawah Program 6P dan PKPP iaitu 3 tahun bagi sektor yang dibenarkan dan 2 tahun bagi sektor beku dan sektor luar dasar.

SOALAN (74)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 2 APRIL 2014 (RABU)

**DARIPADA : Y.B. DR. MANSOR BIN ABD RAHMAN
[SIK]**

SOALAN :-

Y.B. DR. MANSOR BIN ABD RAHMAN [SIK] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah perancangan dan kriteria di pihak Kementerian untuk mengenal pasti potensi bandar-bandar baru yang boleh diwujudkan di kawasan luar bandar di negeri-negeri yang dikenal pasti untuk mengimbangi kepadatan penduduk serta perkembangan ekonomi.

JAWAPAN :-

Tuan Yang di-Pertua,

Untuk makluman Ahli Yang Berhormat, aliran penghijrahan keluar penduduk luar bandar ke bandar-bandar besar telah menyebabkan kemerosotan penduduk luar bandar seluruh negara dari 28.3% pada tahun 2011 kepada 26.9% pada tahun 2013 (Jabatan Perangkaan Negara).

Mengikut Rancangan Fizikal Negara 2, 2010 pembangunan Pusat Pertumbuhan Desa adalah perlu agar masyarakat luar bandar boleh menikmati pendapatan yang lebih tinggi dan kualiti hidup yang lebih baik. Justeru mampu menghindar penghijrahan keluar penduduk khususnya kaum belia.

Secara amnya konsep Pusat Pertumbuhan Desa ini melibatkan pemusatkan aktiviti ekonomi dan kemudahan masyarakat di satu petempatan bagi memberi perkhidmatan kepada kampung-kampung rangkaian di dalam

kawasan tadahannya bagi mewujudkan kesan ekonomi skala (*economies of scale*) bagi meggerakkan kegiatan ekonomi seterusnya.

Kriteria utama di dalam pemilihan Pusat Pertumbuhan Desa adalah seperti berikut:

- (1) Bilangan penduduk yang ramai (melebihi 2,500) bagi menampung kemudahan-kemudahan dan aktiviti-aktiviti ekonomi yang bakal wujud
- (2) Petempatan yang mempunyai potensi pembangunan ekonomi bagi menjana peluang-peluang pekerjaan. Potensi-potensi pembangunan ini adalah dalam bentuk antara lain:
 - (i) Wujudnya sumberjaya yang membolehkan aktiviti-aktiviti ekonomi seperti aktiviti pelancongan dan lain-lain
 - (ii) Mempunyai sistem pengangkutan yang berkesan bagi menghubungkan aktiviti ekonomi hiliran yang bakal wujud di

Pusat Pertumbuhan Desa dengan pusat pekerjaan dan pusat pasaran di bandar-bandar

(iii) Wujudnya tenaga kerja mencukupi dengan kepakaran-kepakaran yang berkaitan

(3) Lokasi petempatan yang agak berpusat supaya mudah dapat diakses oleh kampung-kampung rangkaian

(4) Petempatan yang mampu menampung tambahan infrastruktur dan kemudahan kemasyarakatan

(5) Mempunyai komuniti yang proaktif, bermuafakat serta ingin terlibat sama di dalam memikul tanggungjawab pembangunan ekonomi dan sosial setempat.

Pusat Pertumbuhan Desa boleh dikenal pasti pada Rancangan Tempatan.

Kajian Dasar Perancangan Fizikal Desa Negara yang sedang dilaksanakan

oleh Jabatan Perancangan Bandar dan Desa Semenanjung Malaysia akan memperinci dan memperkuatkan lagi konsep pembangunan Pusat Pertumbuhan Desa dengan mengambilkira perkembangan-perkembangan semasa khusus Dasar Transformasi Kerajaan.

Kementerian Kesejahteraan Bandar,
Perumahan dan Kerajaan Tempatan

April 2014